



## Namaz – rodna kiša za srca vjernika (Medina)

Hatib: dr. Ahmed ibn Talib ibn Abdulhamid

2. safer 1443. po Hidžri / 10. septembar 2021.

Hvala Allahu, Koji Sebi nije uzeo djeteta i Koji u vlasti nema ortaka, i Kome ne treba zaštitnik zbog nemoći, i hvaleći Ga veličaj. Neka su salavat i selam na Njegovog posljednjeg poslanika i najbolje stvorenje, našeg prvaka Muhammeda, sallallahu alejhi ve sellem.

“O vjernici, bojte se Allaha onako kako se treba bojati i umirite samo kao muslimani!”  
(Ali Imran, 102)

O vjernici, zaista je namaz radost očiju onih koji istinski vole Allaha, i užitek duša onih koji samo Njega obožavaju, i stvarno stanje iskrenih, jezičak na vagi onih koji hode Pravim putem. Namaz je Allahova darovana milost Njegovim robovima, On ih je na njega uputio i s njim upoznao, iz milosti i plemenitosti prema njima, kako bi njegovim obavljanjem postigli najveće počasti, i približili se Njemu. Nije im ga propisao zato što su mu njihovi ibadeti potrebni, nego iz Svoje dobrote i blagodati prema njima. Učinio ga je ibadetom srca i tijela u isto vrijeme, i dao je srcu, u njemu, najveći mogući udio, kako bi se ono potpuno predalo svome Gospodaru, uživalo u ljubavi prema Njemu i bilo radosno zbog stajanja pred Njim. Uzvišeni kaže: “Pomozite sebi strpljenjem i molitvom, a to je, zaista, teško, osim poslušnima, koji su uvjereni da će pred Gospodara svoga stati i da će se Njemu vratiti.” (El-Bekara, 45–46) Allahov Poslanik, sallallahu alejhi ve sellem, rekao je: “Istinska radost data mi je u namazu.” Kada bi Poslanik, sallallahu alejhi ve sellem, prolazio kroz tešku situaciju, utočište je tražio u namazu. Allah, džellešanuhu, iskušao je Svoje robove prohtjevima i strastima i njihovim uzrocima, pa im je iz Svoje milosti i dobročinstva propisao “gozbu” koja je objedinila različite vrste poklona, darova, ukrasa, i pozvao ih je na nju svaki dan pet puta, i učinio je da svaka vrsta i svako stanje unutar ove





“gozbe” ima svoj užitak i korist, kako bi Ga na najpotpuniji način obožavali, i kako bi uvećao njihov ugled, i oprostio im grijeh. Svako stanje u namazu ima svoju radost, koju klanjač pronalazi u snazi srca, olakšanim pokretima tijela i nagradi za svaki njegov postupak na Dan susreta sa svojim Gospodarom. Allahov Poslanik, sallallahu alejhi ve sellem, rekao je: “Šta mislite da se pored vrata vaše kuće nalazi rijeka u kojoj se kupate pet puta na dan, da li bi išta od prljavštine ostalo na vašem tijelu?” Ashabi su rekli: “Ne bi ostalo ništa od prljavštine.” Na to Poslanik reče: “Takav je primjer pet dnevnih namaza, Allah njima briše grijeh.” Jednog dana Poslanik, sallallahu alejhi ve sellem, spomenuo je namaz, pa je rekao: “Ko ga bude čuvao, on će mu biti svjetlost, dokaz i spas na Sudnjem danu.” Uzvanik će s ove “gozbe” otići nahranjen i napojen onim što mu je njegov Gospodar pripremio, i zaodjeven odjećom kabula – primanja djela, nakon što je njegovo srce pogodila suša, glad i žeđ. Uzvišeni kaže: “Ti idi Pravim putem, kao što ti je naređeno, i neka tako postupe i vjernici koji su uz tebe, i obijesni ne budite, jer On dobro vidi ono što radite. I ne držite stranu onih koji nepravedno postupaju, pa da vas vatra prži; vi nemate drugih zaštitnika osim Allaha, inače, nema vam pomoći! I obavljaj molitvu početkom i krajem dana, i u prvim časovima noći! Dobra djela zaista poništavaju hrđava. To je pouka za one koji pouku žele. I strpljiv budi! Allah doista neće uskratiti nagradu onima koji dobra djela čine. A zašto je među narodima prije vas bilo samo malo čestitih, koji su branili da se na Zemlji nered čini, koje smo Mi spasili! A oni koji su zlo radili odavali su se onome u čemu su uživali, i grešnici su postali. Gospodar tvoj nije nikada nepravedno uništavao sela i gradove ako su stanovnici njihovi bili dobri. A da je Gospodar tvoj htio, sve bi ljude sljedbenicima jedne vjere učinio. Međutim, oni će se uvijek u vjerovanju razilaziti, osim onih kojima se Gospodar tvoj smiluje. A zato ih je i stvorio. I ispunit će se riječ Gospodara tvoga: ‘Napunit ću, zaista, Džehennem džinima i ljudima – zajedno!’ A sve ove vijesti koje ti o pojedinim događajima o poslanicima kazujemo zato su da njima srce tvoje učvrstimo. I u ovima došla ti je prava istina, i pouka, i vjernicima opomena. I reci onima koji neće da vjeruju: ‘Radite što god možete, a i mi ćemo raditi;





i čekajte, i mi ćemo čekati!’ Allah zna tajne nebesa i Zemlje i Njemu se sve vraća, zato se samo Njemu klanjaj i samo se u Njega uzdaj! A Gospodar tvoj motri na ono što radite.” (Hud, 112–123)

O vjernici, s obzirom na to da se “suša” i “glad”, koji pogađaju ljudske duše, ponavljaju i traju, Allah, džellešānuhu, s vremena na vrijeme, obnavlja poziv na ovu “gozbu”, iz Svoje milosti i dobrote. Čovjek, tako, moli “kišu” od Onoga u Čijim je rukama rodna kiša za srca, kako se ne bi “osušili” plodovi imana i čvrstog ubjeđenja. Uzvišeni Allah kaže: “Obavljaj propise molitve kad sunce s polovine neba krene, pa do noćne tmine, i molitvu u zoru jer molitvi u zoru mnogi prisustvuju. I probdiđ dio noći u molitvi – to je samo tvoja dužnost; Gospodar tvoj će ti na onome svijetu hvale dostojno mjesto darovati. I reci: ‘Gospodaru moj, učini da umrem, a da si Ti zadovoljan mnome i učini da iz mrtvih ustanem, a da si Ti zadovoljan mnome, i daruj mi od Sebe snagu koja će mi pomoći!’ I reci: ‘Došla je istina, a nestalo je laži; laž, zaista, nestaje!’” (El-Isra, 78)

O vjernici! Uzvišeni Allah naredio je Jahjau, sinu Zekerijjaovom, alejhimes-selam, pet stvari, da ih on sam radi i da naredi Benu Israilu da ih i oni rade, rekavši: “Allah vam je naredio namaz, i kada ga budete obavljali, nemojte se okretati, jer Allah upravi Svoje lice prema licu Svog roba, u namazu, sve dok se on ne okrene.” Poslanik, sallallahu alejhi ve sellem, govorio je: “Čovjeku će od namaza biti upisano onoliko koliko je bio prisutan svojim umom.” Tajna, duša i suština namaza ogleda se u tome da se čovjek u potpunosti okrene ka Allahu, i kao što ne priliči klanjaču da okrene svoje lice od kible, isto tako mu ne priliči da okrene svoje srce od svoga Gospodara i zaštitnika. Kaba je kibla za lice klanjača, a Gospodar te kuće je kibla za njegovo srce. Ako upravi svoje lice Allahu, i Allah upravi Svoje lice njemu, a ako se okrene od Allaha i Allah se okrene od njega. Ko u potpunosti ostavi namaz, prekršio je ugovor, zaniijekao je svoga Gospodra i okrenuo se od Njegovog spominjanja, pa kako li je samo prazan njegov život i koliko je njegovo sljepilo! Allahov Poslanik, sallallahu alejhi ve sellem, rekao je: “Ugovor između nas i njih (nevjernika i licemjera) je namaz, i onaj ko ga ostavi, uznevjerovao je.” Uzvišeni kaže: “A onaj ko okrene glavu od





Knjige Moje, taj će teškim životom živjeti i na Sudnjem danu ćemo ga slijepim oživiti. ‘Gospodaru moj’, reći će, ‘zašto si me slijepa oživio kada sam vid imao?’ ‘Evo zašto’, reći će On, ‘dokazi Naši su ti dolazili, ali si ih zaboravljao, pa ćeš danas ti isto tako biti zaboravljen.’ I tako ćemo Mi kazniti sve one koji se pohotama previše odaju i u dokaze Gospodara svoga ne vjeruju. A patnja na onome svijetu bit će, uistinu, bolnija i vječna. Zar njima nije poznato koliko smo naroda prije njih uništili, onih po čijim nastambama oni hode! To su, zaista, dokazi za ljude pametne. I da nije ranije izrečene riječi Gospodara tvoga, kazna bi već bila neminovna. Zato otrpi njihove riječi i obavljaj molitvu, hvaleći Gospodara svoga, prije izlaska sunca i prije zalaska njegova, i obavljaj je u noćnim satima, i na krajevima dana – da bi bio zadovoljan. I nikako ne gledaj dugo ljepote ovoga svijeta koje Mi kao užitak raznim sortama nevjernika pružamo, da ih time na kušnju stavimo, ta nagrada Gospodara tvoga je bolja i vječna. Naredi čeljadi svojoj da namaz obavljaju i istraj u tome! Mi ne tražimo od tebe da se sam hraniš, Mi ćemo te hraniti! A samo one koji se budu Allaha bojali i grijeha klonili čeka lijep svršetak. Mnogobošci govore: ‘Zašto nam ne donese kakvo čudo od Gospodara svoga?’ A zar im ne dolazi objašnjenje o onome što ima u davnašnjim listovima? A da smo ih kakvom kaznom prije njega uništili, sigurno bi rekli: ‘Gospodaru naš, zašto nam nisi poslanika poslao, pa bismo riječi Tvoje slijedili prije nego što smo poniženi i osramoćeni postali.’ Reci: ‘Svi mi čekamo, pa čekajte i vi, a sigurno ćete saznati ko su bili sljedbenici prave vjere i ko je bio na Pravome putu.’” (Ta-ha, 124–135)

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Allah podario blagoslov meni i vama u časnom Kur’anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

